



SIARAN MEDIA

KEMENTERIAN SAINS, TEKNOLOGI DAN INOVASI

ARTSCIENCE™ PRIZE 2025 KINI DIBUKA DENGAN TEMA 'TRANSFORMASI SENI: GABUNGAN AI DAN KELESTARIAN'

KUALA LUMPUR, 27 Mac 2025 – Pertandingan dwitahunan **ArtScience™ Prize** anjuran Akademi Sains Malaysia (ASM), agensi dibawah Kementerian Sains, Teknologi dan Inovasi (MOSTI) kini telah dibuka bermula **20 Mac hingga 20 Mei 2025**. ArtScience™ Prize 2025 menjemput bakat-bakat tempatan untuk mencipta karya seni yang memartabat serta memajukan kehidupan manusia melalui pendekatan disiplin sains dan seni.

ArtScience™ Prize 2025 membawa tema **'Mengubah Masa Depan Seni: Penyatuan AI dan Kelestarian'** yang menggalakkan artis dan saintis untuk mendalami teknologi kecerdasan buatan (AI) dan mampu merevolusikan kelestarian alam.

Menurut Menteri Sains, Teknologi dan Inovasi, YB Tuan Chang Lih Kang, “ArtScience™ Prize 2025 merupakan titik pertemuan yang menarik antara sains, teknologi dan kreativiti. Teknologi kecerdasan buatan berpotensi mentakrifkan semula definisi seni seiring menangani beberapa cabaran global yang mendesak termasuk kelestarian alam. Pertandingan ini menggalakkan bakat-bakat Malaysia untuk meneroka sempadan inovasi dan mencipta karya berimpak tinggi yang memberi inspirasi kepada perubahan ke arah masa depan yang lebih lestari dan inklusif. Saya tidak sabar untuk menyaksikan bagaimana artis dan saintis berbakat yang akan menggunakan peluang ini untuk memperbaharui imaginasi berkaitan ArtScience™”.

Presiden ASM, Academician Datuk Dr. Tengku Mohd Azzman Shariffadeen FASc berkata, “Inisiatif ArtScience™ berfungsi sebagai sebuah platform untuk merangsang budaya kreativiti dan inovasi pada tahap yang lebih tinggi. Pengintegrasian antara sains dan seni dapat membantu menguatkan inti pati sebenar inovasi serta makna dan tujuan untuk pembangunan ekonomi dan sosial. ASM juga berharap agar karya yang dihasilkan menerusi ArtScience™ Prize 2025 mampu memberi perubahan kepada kehidupan masyarakat secara amnya.”

Penyertaan bagi ArtScience™ Prize 2025 dibuka kepada semua rakyat Malaysia, sama ada yang menetap di dalam atau di luar negara, secara individu atau berkumpulan. Peserta mestilah berumur 18 tahun ke atas dan setiap peserta hanya boleh menghantar satu penyertaan. Semua bentuk media termasuk lukisan, arca, video, media baharu dan persembahan adalah diterima **sehingga 20 Mei 2025 sahaja**. Penghantaran hasil karya boleh dibuat melalui pautan <https://www.akademisains.gov.my/artscience/prize-2025/>

Pemenang ArtScience™ Prize 2025 akan menerima sebuah trofi dan wang tunai berjumlah RM20,000. **Penerima Anugerah Bintang Baharu** akan membawa pulang sebuah trofi dan wang tunai berjumlah RM10,000. Pemenang Anugerah Pilihan Ramai akan menerima sebuah trofi dan wang tunai berjumlah RM5,000 dan dua orang peserta peringkat akhir akan menerima wang tunai berjumlah RM2,500. Selain itu, geran sokongan ASM ArtScience™ Travel Fellowship berjumlah RM5,000 akan dianugerahkan kepada pemenang dan penerima Anugerah Bintang Baharu.

ArtScience™ Prize 2025 menawarkan peluang yang julung-julung kalinya kepada artis dan saintis di Malaysia untuk mempamerkan karya yang mencerminkan masa depan inovasi dan seni. Untuk maklumat lanjut, sila layari laman web rasmi ArtScience di pautan <https://www.akademisains.gov.my/artscience/>.

#TAMAT#

Diterbitkan oleh:

KEMENTERIAN SAINS, TEKNOLOGI DAN INOVASI
27 Mac 2025



Pertanyaan media:

Unit Komunikasi Korporat Akademi Sains Malaysia

Syakirah Nurizzati Mohamad Hood

syakirah.nurizzati@akademisains.gov.my

(+6017 678 0925)